



Sesida dals

Communitgà ils

Protocol nr.

9 da zercladur 2026

11 da zercladur 2026

424/2026

Dumonda Rutishauser

concernent il studi da bachelor da tgira en il Grischun

Resposta da la Regenza

Tar la dumonda 1: La decisiun da realisar il studi da tgira SAS (scolaziun academica da tgira) sco cooperaziun tranter la Scola auta turtigaisa per scienzas applitgadas (ZHAW) e la Scola auta spezialisada dal Grischun (SASGR), è tenor la Lescha davart las scolas autas e la perscrutaziun (LSAP; DG 427.200) en la cumpetenza dal cussegl da scola auta (cf. art. 13 lit. a^{bis} LSAP).

La decisiun dal cussegl da scola auta sa basa sin ils suandants facturs:

- a) pretensiuns a las cumpetenzas ed a las enconuschientschas che ston vegnir acquistadas da las absolventas e dals absolvents (cf. Lescha federala davart las professiuns da sanadad [Lescha davart las professiuns da sanadad, LPSan; CS 811.21] sco er art. 2 da l'Ordinaziun davart las cumpetenzas specificas per las professiuns da sanadad tenor la LPSan [OCPSan; CS 811.212]);
- b) cundiziuns areguard l'accreditaziun obligatorica da programs tenor la LPSan e la OCPSan;
- c) rentabilitad (volumen potenzial da la quantidad da studentas e students).

En spezial il factur a) premetta in studi academic independent ch'è organisà tenor ils principis da la SAS. Las absolventas ed ils absolvents ston ultra da quai esser abels d'identifitgar il basegn da perscrutaziun en la pratica da tgira, da sa participar a dumondas da perscrutaziun e da realisar las enconuschientschas en moda efficazia (cf. art. 2 lit. j OCPSan). En quest lieu sa mussi, ch'il studi da bachelor (BSc) da tgira SAS sa differenziescha cleramain d'ina scolaziun da tgira SSS.

Il studi da cooperaziun cun la ZHAW pussibilitescha – resguardond ils facturs numnads qua survast – da porscher gia a partir da l'atun 2026 in BSc da tgira SAS en il Grischun. Uschia vegn ademplì il medem mument il giavisch tematisà en la debatta davart la revisiun parziala da la LSAP, da procurar uschè svelts sco pussaivel per ina realisaziun (cf. missiva carnet nr. 8/2023–2024). In studi da tgira SAS a la SASGR vegn en emprima lingia a depender dal volumen potenzial da studentas e students.

Ultra da quai ston vegnir ademplidas las pretensiuns legalas areguard las cumpetenzas e las abilitads sco er l'accreditaziun dal program da la Confederaziun. Perquai che la dumonda è actualmain pitschna, sa chattassan ils custs che resultassan d'ina purschida d'in BSc da tgira SAS independent cleramain sur la media svizra. Per la fasa da concepziun d'in BSc da tgira SAS èsi indispensabel da collavurar cun ina SAS externa, per pudair s'acquistar il know-how necessari.

Tar la dumonda 2: Entaifer l'incarica da prestaziun respectiva decida il cussegl da scola auta definitivamain davart la creaziun da novs studis che duain vegnir purschids en moda independenta u en cooperaziun. Sco gia explitgà en la resposta a la dumonda 1, sa differenziescha la furmaziun da tgira SSS cleramain d'in BSc da tgira SAS. L'integrasiun d'instituziuns da furmaziun chantunals ston ins adina prender en mira, sche cooperaziuns e sinergias servan al sector da sanadad en il chantun.

Sin basa da la legislaziun federala davart las professiuns da sanadad dovri per il BSc da tgira SAS in'architectura da studi che premetta in access reglà, che includa la perscrutaziun e che s'orientescha al chalender da semesters academics.

Tar la dumonda 3: Cun l'entrada en vigur da la LSAP e da l'Ordinaziun respectiva davart las scolas autas purtadas dal chantun (OSA) è il cussegl da scola auta respectiv cumpetent da decider davart l'introducziun da singuls novs studis. La Regenza decida, sch'i vegn concepì in nov sector spezial (p.ex. sector spezial sanadad). La SASGR ha exprimì l'intenziun ed en il fratemp er inoltrà ina dumonda per stgaffir in sector spezial sanadad. La dumonda vegn actualmain examinada. Ils criteris per la Regenza resultan da las basas legalas per conceder ina incarica da prestaziun cun contribuziun globala (art. 19 LSAP):

- en l'interess da l'economia publica (dumonda);
- rentabilitad e spargnusadad en la direcziun finanziala (finanziaziun);
- pussaivladad da colliaziun tras ils standards da qualitat pretendids tenor la legislaziun federala (accreditaziun);
- trair a niz sinergias en il Grischun sco piazza da scolaziun en il sector da la sanadad.



Il president:

Martin Bühler

En num da la Regenza

Il chancelier:

Daniel Spadin